



册府元龜
卷之二百二十四
至二十六



13
849
76



門 3
849
76



冊府元龜

淮南李嗣京參閱

西極文翔鳳訂正

豫章黃國琦較釋

僭偽部

奉先

孝友

宗族

奉先

夫有國家者必尊尊親親以敦厚風教雖盜有皇器
竊據神鄉亦考尋古昔稽合禮文以為崇薦之事不
可忘歸尊之義不可廢所以表孝饗而慰神靈也乃

冊府元龜

僭偽部

卷之三百二十四

奉先
至追宗廟之號上園寢之名升陽位以配皇天居明
堂以侑上帝陳其樂舞豐其粢盛奉顯相之容竭祇
肅之意誠追遠而斯在顧假名而焉如

前凉張茂嗣兄實爲凉州牧私謚實曰昭公

張駿嗣季父茂爲凉州牧私謚茂曰成公

張重華嗣父駿爲凉州牧私謚駿曰文公

張耀靈嗣父重華爲西平公私謚重華曰昭公後改

桓公

張祚僭稱帝追崇曾祖軌爲武王祖實爲昭王從祖
茂爲成王父駿爲文王弟重華爲明王

前趙劉元海初僭漢王位追尊蜀後王爲孝德皇帝
立漢高祖以下三祖五宗神主而祭之

劉和嗣父元海僭帝位僖謚元海爲光文皇帝廟號

高祖墓號永光陵

劉聰僭卽帝位新作太廟

劉粲嗣父聰卽僖位謚聰曰昭武皇帝廟號烈宗

劉曜旣卽僖位使劉雅迎母胡氏喪于平陽還塋東

邑墓號陽陵僖謚宣明皇太后僭尊高祖父亮爲景

皇帝曾祖父廣爲獻皇帝祖防爲懿皇帝考曰宣成

皇帝都長安繕宗廟以冑頓配天元海配上帝

後趙石勒初為侍中征東大將軍母王氏死潛鑿山
谷莫詳其所既而備九命之禮虛葬于襄國城南後
僭稱趙王始立宗廟及僭號趙天王行皇帝事尊其
祖邪曰宣王父周曰元王勒僭即皇帝位追尊其高
祖曰順皇曾祖曰威皇祖曰宣皇父曰世宗元皇帝
妣曰元昭皇太后

石弘嗣父勒偽位號勒墓為高平陵偽謚明皇帝廟
號高祖

石季龍僭稱大趙天王追尊祖弼邪武皇帝父寇覽
太宗孝皇帝其後藉田畢遂如襄國謁勒墓

石遵即偽位號季龍墓為顯原陵偽謚武帝廟號太
祖

石閔僭即偽位國號大魏復姓冉氏追尊其祖隆元
皇帝考贍烈祖高皇帝

前燕慕容雋既即偽位追尊祖廐為高祖武宣皇帝
父皝為太祖文皇帝使昌黎遼東二郡營起廐廟范
陽燕郡構皝廟以其護軍平熙領將作大匠監造二
廟焉

慕容暉嗣父雋偽位謚雋為景昭皇帝廟號烈祖墓
號龍陵

前秦苻健僭帝偽位謚父洪爲惠武帝

苻生嗣父健偽位謚健明皇帝廟號世宗後改曰高

祖

苻堅僭稱大秦天王追謚父雄爲文桓皇帝起明堂
繕南北郊郊祀其祖洪以配天宗祀其伯健於明堂
以配上帝

苻丕僭卽帝位追謚父堅曰世祖宣昭皇帝

苻登僭卽帝位偽謚族父丕爲哀平皇帝

苻崇僭稱尊號偽謚父登曰高皇帝廟號太宗

後秦姚萇僭卽帝位追謚父弋仲曰景元皇帝廟號

始祖墓曰高陵置園邑五百家又謚兄襄魏武王

姚興嗣父萇偽位謚萇爲武昭皇帝廟號太祖墓稱

厚陵

魏泓嗣父興偽位謚興爲文桓皇帝廟號高祖墓曰

偶陵

後蜀李雄僭稱成都王追尊其曾祖武曰巴郡桓公

祖慕隴西襄王父特成都景王及僭號曰尊特曰景

皇帝廟號始祖又追謚弟流秦文王

李班嗣叔父雄偽位謚雄武帝廟曰太宗墓號安都

陵

李壽僭即帝位追尊父驤為獻帝後改立宗廟以驤為漢始祖廟以初封漢王欲改國號特雉為大成廟

李勢嗣父壽位偽謚壽為昭文皇帝廟曰中宗墓曰安昌陵

後涼呂光既僭即二河王位以太廟新成追尊其高祖為敬公曾祖為恭公祖為桓公父婆樓為景昭王母曰昭烈妃其中書侍郎楊穎上疏請依三代故事追尊呂望為始祖永為不遷之廟從之

呂紹嗣父光位偽謚光為懿武皇帝廟號太祖墓曰高陵

呂隆嗣兄纂僭即天王位偽謚纂靈皇帝墓曰石陵後燕慕容垂僭即皇帝位繕宗廟追尊母蘭氏為文昭皇后

慕容寶嗣父垂位偽謚垂武成皇帝廟號世祖墓曰宣平陵

慕容盛嗣父寶位偽謚寶惠愍皇帝廟號烈宗追尊伯考獻莊太子全為獻莊皇帝

慕容熙僭即帝位偽謚慕容盛昭武皇帝墓號興平陵廟號中宗

西秦乞伏乾歸嗣兄國仁位自稱河南偽謚國仁宣

烈王廟號烈祖

乞伏熾盤嗣父乾歸位偽謚乾歸武元王

北燕馮跋僭稱太王追尊祖和為元皇帝父安為宣

皇帝遣其太常丞劉軒徙北部人五百戶于長谷為

祖父園邑

南凉秃髮利鹿孤嗣兄馬孤位偽謚馬孤曰武王廟

號烈祖

秃髮傉檀嗣兄利鹿孤位偽謚利鹿孤曰康王

南燕慕容德僭即帝位于廣固設行廟於宮南遣使

奉策告成

慕容超嗣叔父德位偽謚德獻武皇帝

夏赫連勃勃僭即帝位追尊其高祖訓兒曰元皇帝

曾祖武曰景皇帝祖豹子曰宣皇帝父衛辰曰桓皇

帝廟號太祖母符氏曰桓文皇后

吳楊渭僭即帝位追尊父行密為太祖武皇帝兄渥

為景帝

楊蒲嗣兄渭位偽謚渭宣帝

閩王延鈞僭即帝位追尊父審知為武皇帝

王稷嗣父延鈞位偽謚延鈞為惠帝

前蜀王衍嗣父建位偽謚建為神武聖文孝德明惠

皇帝廟號高祖墓曰永陵

後蜀孟昶嗣父知祥位偽謚知祥為文武聖德英烈

明孝皇帝廟號高祖陵日和陵

前漢劉玠襲父陟位偽謚陟為太皇大帝廟號高祖

陵曰肅陵

劉銀嗣父晟位偽謚晟文武光聖明孝皇帝廟號中

宗陵曰昭陵

孝友

四星東聚五馬南浮獯醜阻兵姦滌盜土昏迷自恣
忿驚嘗生亦有懷孝愛之情知友于之分居喪過禮

臨難相先雖非仁義之所成固亦染習而斯至

前趙劉元海嚙亂英惠七歲遭母憂擗踊號叫哀感

旁鄰宗族部落咸共歎賞司空太原王昶等聞而嘉

之並遣弔賻

前秦苻堅率眾向鄴至安陽過舊閭引諸耆老語及

祖父之事泫然流涕乃停信宿

後秦姚萇襄之弟也嘗從襄征伐襄之敗于麻田也

馬中流矢死萇下馬以授襄襄曰汝何以自免萇曰

但令兄濟豎子安敢害萇會救至俱免

姚興母蚩氏死興哀毀過禮不親庶政群臣議請依

漢魏故事既葬即吉尚書郎李嵩上疏曰三王異制五帝殊禮孝治天下先王之高事也宏遵聖性以光遺訓既葬之後應素服臨朝率先天下仁孝之舉也尹緯駁曰帝王喪制漢魏為準嵩矯嘗越禮愆于軌度請付有司以專擅論既葬即吉乞依前議興曰嵩忠臣孝子有何咎乎尹僕射棄先王之典而欲尊漢魏之權制豈所望於朝賢哉其一依嵩議興班告境內及在朝文武立名不得犯叔父緒及頌德之名以彰殊禮興謙恭孝友每見緒及頌德如家人之禮

德皆興之叔父也

頌緒

後蜀李雄母羅氏死雄欲申三年之禮群臣固諫雄弗許李驥謂司空上官惇曰今方難未弭吾欲固請不聽主上終諒闇君以為何如惇曰三年之喪自天子達故孔子曰何必高宗古之人皆然但漢魏以來天下多難宗廟至重不可久曠故釋縗經至哀而已驥曰任回方至

任回為至南也

此人決於行事且上嘗難違其言待其至當與俱請及回至驥與回俱見雄驥免冠流涕固請公除雄號泣不許回跪而進曰今王業初建凡百草創一日無主天下惶惶昔武王素甲觀兵晉襄墨經從戎豈所願哉為天下屈已故也願陛

下割情從權永隆天保遂強扶雄起釋服親政
南燕慕容德僭立於廣固德母兄先在長安遣平原
人杜弘如長安問存否弘曰臣至長安若不奉太后
動止便卽西如張掖以死爲効臣父雄年踰六十未
沾榮貴乞本縣之祿以申烏鳥之情張華進曰杜弘
未行而求祿要利情深不可使也德曰吾方散所輕
之財招所重之死况爲親尊而可吝乎且弘爲君迎
親爲父求祿雖外如要利內實忠孝乃以雄爲平原
令弘至張掖爲盜所殺德聞而悲之厚撫其妻子及
故吏趙融自長安來始知母兄凶問德號慟吐血因

而寢疾

宗族

典午失馭羣雄構亂茫茫九土一唱千和於是跨州
連郡鴟張蟻聚盜王者之位擬乘輿之制以樹立子
弟列爲藩輔式是古訓以隆邦翰展親之義靡或闕
如疆幹之術於是乎在乃有采夫公望隆其寵數靡
容濟濟之讓克厚尊尊之權惇睦無間情禮兼至者
焉
前涼張祚僭帝位以弟天錫爲長樂王子庭堅爲建
康王弟子靚爲涼武侯

張天錫自稱西平公以從弟慮為從事中郎
西涼李嵩僭稱涼公以其子讓為敦煌太守

李歆嗣僞位既為沮湫所敗諸弟酒泉太守翻新城
太守預領羽林右監密左將軍朓右將軍亮等西奔
敦煌太守恂與諸子棄敦煌奔于北山歆子重耳奔
于江左仕于宋復歸魏為弘農太守蒙遜徙翻子寶
等于姑臧

前趙劉元海僭即帝位以子和為大司馬封梁王又
以劉歡樂為大司徒封陳留王宗室以親疎為等悉
封郡縣王又封子裕為齊王隆為魯王又為北海王

後以子聰為大司徒劉歡樂為太傅劉延年為大司
空劉洋為大司馬及元海寢疾將為顧託之計以歡
樂為太宰洋為太傅延年為太保聰為大司馬大單
于並錄尚書事置單于臺于平陽西以其子裕為大

司馬

臣欽若等曰自觀樂已下載記不書於元海何親故并姓言之後皆放此

又有衛尉

西昌王劉銳領軍劉盛侍中劉乘武衛劉歆劉濬及
劉安國劉宣宣子士則初為左賢王元海即王位宣
之謀也故特荷尊重勲戚莫二軍國內外靡不專之
劉聰僭即帝位封其子粲為河內王使持節撫軍大
將軍都督中外諸軍易河間王翼彭城王悝高平王

後以劉易爲太尉遷太宰

劉曜僭卽帝位封子襲爲長樂王闡太原王冲淮南王敞齊王高魯王徽楚王徽諸宗室皆封郡王又封子喬爲永安王署侍中衛大將軍都督二宮禁衛諸軍事開府儀同三司錄尚書事領太子太傅後爲大司馬進封南陽王以漢陽諸郡十三爲國又有大宰劉雅鎮軍劉錫右軍劉幹侍中中山王劉岳大尉汝南王劉咸大司徒劉綏

後趙石勒僞稱天王行皇帝事署其子宏爲持節散騎嘗侍都督中外諸軍事驃騎大將軍大單于封秦王左衛將軍斌大原王少子恢爲輔國將軍南陽王又封石生河東王石瑛彭城王又以中山王石季龍子邃爲兖州刺史封齊王加散騎嘗侍武衛將軍宣爲左將軍挺爲侍中梁王

石季龍僭稱大趙天王親王皆貶封郡公以子宣爲河間公韜爲樂安公斌爲燕公遵爲彭城公鑒爲義陽公宣後爲皇太子韜爲司徒又加大尉與太子宣迭日省可尚書奏事斌爲使持節侍中大司馬錄尚書事又命宣韜生殺拜除皆迭日省決不復啟也其後季龍僭卽帝位諸子進爵郡王及疾甚以遵爲大將

軍鎮關右斌爲丞相錄尚書事

前燕慕容雋初僭稱王以弟恪爲輔國將軍評爲輔
弼將軍及僭帝位以恪爲侍中封太原王評爲都督
秦雍益梁江揚荆徐兗豫十州河南諸軍事封子臧
爲樂安王泓爲齊北王冲爲中山王

慕容暉僭卽帝位以慕容恪爲大宰錄尚書行周公
事慕容評爲太傅副贊朝政初慕容皝將終謂子雋
曰今中原未一方建大事恪智勇俱濟汝其委之及
雋嗣位彌加親任累戰有大功雋寢疾引恪與慕容
評屬以後事雋死群臣欲立恪恪辭曰國有儲君非

吾節也及暉之世摠攝朝權恪虛襟待物諮詢善道
量才處任使人不踰位朝廷謹肅進止有嘗雙雖執
權政每事必諮之於評罷朝歸第則盡心色養手不
釋卷其百僚有過未嘗顯之自是庶僚化德稀有犯
者其後暉境內多水旱恪評並稽首歸政請遜位還
第暉斷其讓表格評等乃止恪臨終暉親臨問以後
事恪曰臣聞報恩莫大薦士板築猶可而况國之懿
藩吳王文武兼才管蕭之亞陛下若任之以政國其
少安不然臣恐二寇必有闕關之計言終而死
前秦苻健僭稱天王大單于以弟雄爲丞相都督中

外諸軍事車騎大將軍領雍州刺史及僭卽帝位雄
爲佐命元勳權侔人主而謙恭奉法健嘗曰元才吾
姬旦也及卒健哭之歐血曰天不欲吾定四海邪何
奪元才之速也

符生僭卽帝位以符安領大尉符柳爲征東大將軍
并州牧鎮蒲坂符謏爲征東大將軍豫州牧鎮陝城
符堅僭稱天王以兄法爲使持節侍中都督中外諸
軍事丞相錄尚書從祖彥爲太尉從兄柳爲車騎大
將軍尚書令封弟融爲平陽公雙河南公子暉平原
公熙廣平公熙鍾鹿公楊東海公敷清河公融字博

休符健之世封安樂王融上疏固辭健深奇之曰且
成吾兒箕山之操乃止符生愛其器貌嘗侍左右未
弱冠卽有台輔之望長而令譽彌高爲朝野所屬後
拜侍中中書監都督中外諸軍事車騎大將軍司隸
較尉太子太傅領宗正錄尚書事俄轉司徒融苦讓
不受後爲鎮東大將軍兗州牧融將發堅祖於霸東
奏樂賦詩初爲侍中中軍將軍銓綜內外別政脩理
進才理滯王景畧之流也尤善斷獄姦無所容故爲
堅所委任雖鎮關東朝之大事靡不馳駟與融議之
始議伐晉融曰吳不可伐堅不納及淝水之戰融馳

騎略陣馬倒被殺軍遂大敗堅還次于長安東之行宮哭融而後入贈融大司馬謚曰襄公

符丕僭卽帝位封子懿爲勃海王昶爲濟北王又以符冲爲左光祿大夫尙書左僕射封西平王符纂爲太尉東海王纂爲符堅尙書令封魏長公堅敗自關中來奔故有是拜又以阜城侯符定爲征東將軍冀州牧高城侯符紹爲鎮東將軍督冀州諸軍事重合侯符謨爲征西將軍幽州牧高邑侯符亮爲鎮北大將軍督幽平二州諸軍事並進爵郡公定紹據信都謨亮先據嘗山慕容垂之圍鄴城也並降于垂聞丕

稱尊號遣使謝罪故有是命其後又以符纂爲大司馬符冲爲車騎大將軍尙書令儀同三司及丕敗纂及弟師奴率丕餘衆數萬奔據杏城符登僭卽帝位遣使拜符纂爲使持節侍中都督中外諸軍事太師領大司馬進封魯王纂弟師奴爲撫軍大將軍并州牧朔方公纂怒謂使者曰渤海王世祖之孫先帝之子南安王何繇不立而自尊乎纂長史王旅諫曰南安已立理無中改賊虜未平不可宗室之中自爲仇敵願大王遠蹤光武推聖公之義梟二虜之後徐更圖之纂乃受命登又封子牟爲南安

王尚為非海王

後秦姚萇僭即帝位以弟緒為司隸較尉鎮長安碩德為征西將軍秦州刺史都督隴右諸軍事領護羌較尉鎮上邽後以安定地狹且逼符登使碩德鎮安定徙安定千餘家于陰密遣弟征南靖鎮之

姚興僭即帝位封叔父征虜緒為晉王征西碩德為隴西王征南靖為公

不書國名

又以碩德為秦州牧領護

東羌較尉鎮上邽與班告境內及在朝文武立名不得犯叔父緒及碩德之名以彰殊禮興謙恭孝友每見緒及碩德如家人之禮整服傾悚言則稱字直馬

服玩必先二叔然後服其次者朝之大政必諮之而後行後興以日月薄蝕災眚屢見降號稱王緒與碩德同讓王爵興弗許緒等又固讓許之又子懿弼誥宣謹情璞質達裕國兒皆為公

姚泓僭即帝位以姚紹為大宰大將軍大都督都督中外諸軍事假黃鉞改封魯公侍中司隸宗正郎錄並如故朝之大政皆往決焉紹固辭弗許紹泓之叔父也泓聞姚懿將襲長安召紹等密謀於朝堂紹曰懿情識鄙近從物推移造成此事惟當孫暢耳但馳使徵暢遣撫軍攢據陝城臣向潼關為諸軍節度若

暢奉詔而至者臣當遣懿率河東見兵共平吳寇如其逆釁已成違距勅旨當明其罪於天下聲鼓以擊之泓曰叔父之言社稷之計後果執懿因之誅孫暢等及泓之敗其子佛念年十一兵至泓欲降佛念謂泓曰晉人將逞其欲終必不全願自裁決泓憮然不答佛念遂登宮牆自投而死

蜀李特自稱大都督以兄輔為驃騎將軍弟驤為驍騎將軍長子始為武威將軍次子蕩為鎮軍將軍

李雄僭稱成都王以其叔父驤為太傅兄始為太保折衝李離為太尉建威李雲為司徒副軍李黃為司

空等官李國為太宰

李期僭即帝位封兄越建寧王拜相國大將軍錄尚書事

李勢僭即帝位其弟大將軍漢王廣以勢無子求為太弟勢弗許

後涼呂光僭即三河王位以其子左將軍他武賁中郎將纂討北虜及僭即帝位諸子弟為公侯者二十人時羣議以高昌雖在西垂地居形勝外接胡虜易生翻覆宜遣子弟鎮之光以子覆為使持節鎮西將軍都督玉門巴西諸軍事西域大都護鎮高昌命大

臣子弟隨之其後光疾甚立其太子紹為天王以呂纂為太尉呂弘為司徒謂紹曰吾疾病唯增恐將不濟三寇關關迭伺國隙吾終之後使纂統六軍弘管朝政汝恭已無為委重二兄庶可以濟若內相猜貳釁起蕭牆則晉趙之變旦夕至矣又謂纂弘曰永業紹字才非撥亂直以正嫡有嘗猥居元首今外有強寇人心未寧汝兄弟緝穆則貽厥萬世若內自相圖則禍不旋踵纂弘泣曰不敢有二心

呂纂既僭立以弟弘為使持節侍中大都督都督中外諸軍事大司馬車騎大將軍司隸校尉錄尚書事

封番禾郡公

呂隆僭稱天王以弟起有佐命之勲拜使持節侍中都督中外諸軍事輔國大將軍司隸校尉錄尚書事封安定公

後燕慕容垂自稱燕王以弟德為車騎大將軍封范陽王兄子楷為征西大將軍封太原王其後有左將軍慕容固平北慕容佐衛軍慕容麟鎮南慕容紹樂浪王宙高陽王隆丹陽王瓚開封公詳及慕容鍾慕容永慕容農

不書何親

慕容寶嗣偽位庶子清河公會長樂公盛並進王爵

西秦乞伏乾歸僭稱河南王有弟益州爲前將軍秦州牧軻殫爲涼州牧軻殫與益州不平奔于呂光又有弟廣武智達揚武木奕于乾歸長子熾磐次于中軍審虔

熾盤襲僞位署弟延祚爲禁中錄事

北燕馮跋僭稱天王署弟素弗爲侍中車騎大將軍錄尚書事弘爲侍中征東大將軍尚書右僕射汲郡公從兄萬泥爲驃騎大將軍幽平二州牧素弗後爲大司馬改封遼西公弘爲驃騎大將軍改封中山公跋之僞業素弗所建也跋之七年素弗死跋哭之哀

慟比葬七臨之跋弟丕先是因亂投於高句麗跋迎致之至龍城以爲右僕射嘗山公跋從兄買從弟睹自長樂率五千餘戶來奔署買爲衛尉封城陽伯睹爲太嘗高城伯

南京秃髮烏孤僭稱武威王署弟利鹿孤爲驃騎大將軍西平公鎮安夷僭檀爲車騎大將軍廣武公鎮西平後以利鹿孤爲涼州牧鎮西平僭檀入錄府國事

秃髮僭檀僭稱涼王爲乞伏熾磐所降其少子保周臘于破羗俱延子覆龍鹿孤孫副周烏孤承鉢皆奔

沮渠蒙遜久之歸魏魏以保周為張掖王覆龍酒泉
公破羌西平公副周永平公承鉢昌松公

南燕慕容德僭稱燕王以慕容麟為司空領尚書令
慕容法為中軍將軍及僭即帝位以慕容鍾為司徒
鍾字道明德從弟也臨難對敵智勇兼濟累進奇策
德用之頗中繇是政無大小皆以委之遂為佐命元
勲

慕容超嗣偽位以慕容鍾為都督中外諸軍務錄尚
書事加青州牧又以慕容法為征南都督徐兗揚南
兗四州諸軍事慕容銜加開府儀同三司又有侍中

慕容統右衛慕容根及慕容昱慕容晷

北涼沮渠蒙遜為沙州刺史以其弟拏為護羌校尉
秦州刺史封安平侯鎮姑臧旬餘而拏死又以從祖
益子為鎮京將軍護羌校尉秦州刺史鎮姑臧及僭
即河西王位西視金山遣沮渠廣宗率騎一萬襲烏
蹄虜大捷而還又遣前將軍沮渠成都將騎五千襲
卑利虜降之

夏赫連勃勃僭稱天王以其長兄右地代為丞相代
公次兄萬侯提為大將軍魏公叱千阿利為御史大
夫梁公弟阿利羅引為征南將軍司隸較尉若門為

尚書令叱以鞭為征西將軍尚書左僕射乙斗為征
非將軍尚書右僕射兄子羅提為右將軍其後以叱
子阿利領將作大匠封子延陽平公昌太原公倫酒
泉公定平原公滿河南公安中山公又以其子瑱都
督前鋒諸軍事領撫軍大將軍率騎二萬南伐長安
及尅長安僭即帝位以侯提為并州刺史鎮蒲坂于
長安置南臺以瑱領大將軍雍州牧錄南臺尚書事
閩王延鈞初封閩王表兄延稟為建州節度使累官
至中書令頃之延稟以軍州委長子繼雄退居別第
王昶僭號以其子繼恭為福州節度使

王延正僭號其子繼勳為泉州刺史

唐李景儼號以仲弟遂為皇太弟季弟遠為齊王

前蜀王衍襲父建偽位封建子宗壽為嘉王宗弼為

六軍使又有宗勳宗儼宗昱

不書王爵

後漢劉崇僭號於河東署其子承鈞為侍衛親軍都

指揮使太原尹

册府元龜 奉先 卷之三十四

終

册府元龜

淮南李嗣京叅閱

西極文翔鳳訂正

豫章黃國琦較釋

僭偽部 七

世子

自晉人失御群雄競逐山河跨據率僭尊極之稱子弟世及亦濫儲兩之制其間篡害廢立十嘗七八雖蜀有世文趙有大雅好文愛士而不免于禍固與夫貞萬邦繼大統者異矣今以世子命篇者亦猶異楚

册府元龜 僭偽部 卷之三十四

稱王春秋書其爵以子之義也唐季諸國并附出焉
前凉張軌既爲梁州牧表立子實爲世子軌卒實紹
位

張駿寔之弟爲梁州牧西平公境內皆稱之爲王駿
立子重華爲世子時中堅將軍宋輯言於駿曰禮意
儲君者蓋重宗廟之故周成漢昭立於襁褓誠以國
嗣不可曠儲宮當素定也昔武王始有國元王作儲
君建興之禮先王在位殿下正名統况今社稷彌崇
聖躬介立大業遂殷繼貳闕然哉臣竊以爲國有累
卵之危而殿下以安踰太山非所謂也駿納之及駿

卒重華紹位

張祚重華之庶兄既篡耀靈僭卽帝位立其子太和
爲皇太子祚爲玄靚所殺并誅太和張天錫駿之少
子玄靚死國人立之爲凉州刺史西平公以子大懷
爲世子其後廢爲高昌公更立嬖子大豫爲世子
西凉李暠領秦梁二州牧世子譚早卒以第二子上
業爲世子表假撫軍將軍護羌校尉暠卒上業嗣
前趙劉元海既僭號立其子和爲太子元海死和嗣
僞位爲弟聰所殺

劉聰既殺兄和卽僞位立其弟北海王乂爲皇太弟

領大單于其後用血於其東宮延明殿徹瓦在地者深五寸又惡之以訪其太師盧志太傅崔瑋太保許遐志等曰主上往以殿下爲太弟者蓋以安衆望也志在晉王父矣晉王聰子粲也王公以下莫不希旨歸之相國之位自魏武以來非復人臣之官主上本發明詔正之爲贈官今忽以晉王居之羽儀威尊踰於東宮萬機之事無不繇之置太宰大將軍及諸王之營以爲羽翼此事勢去矣殿下不得立明也然非止不得立而已不測之危厄在於旦夕宜早爲之所四衛精兵不減五千餘營諸王皆年齒尚幼可奪而取之相

國輕佻正可煩一刺客耳大將軍無日不出其營可襲而得也殿下但當有意二萬精兵立便可得鼓行向雲龍門宿衛之士孰不倒戈奉迎大司馬不慮爲異也父弗從乃止東宮舍人荀裕告盧志等勸父謀反父不從之狀聰於是收志瑋遐於詔獄假以他事殺之使寇虜卜抽監守東宮禁父朝賀父憂懼不知所爲乃上表自陳乞爲黔首并免諸子之封褒美晉王粲宐登儲副抽又擲而弗通時中宮僕射郭猗等皆寵幸用事斬準合宗內外諂以事之郭猗有憾於父謂晉王粲曰太弟于主上之世猶懷不逞之志此

則殿下父子之深仇四海蒼生之重怨也而主上過
垂寬仁猶不替二尊之位一旦有風塵之變臣妄爲
時下寒心且殿下高祖之世孫主上之嫡寵凡在含
齒孰不係仰萬機事大何可與人臣昨聞太弟與大
將軍相見極有言矣若事成許以主上爲太上皇大
將軍爲太子父又許衛將軍爲大單于二王已許之
矣二王居不疑之地并握重兵以此舉事事何不成
臣謂二王茲舉禽獸之不若也昔父親人人豈親之
今又苟貪其一切之力耳事成之後主上豈有全理
殿下兄弟故在忠言東宮相國單于在武陵兄弟何

肯與人許以三月上巳因讎作難事淹變生宜早爲
之所春秋傳曰蔓草猶不可除况君之寵弟乎臣屢
啟主上主上性敦友于謂臣言不實刑臣刀鋸之餘
而蒙主上殿下成造之恩故不慮逆鱗之誅每所聞
必言與垂採納臣當入言之願殿下不泄密表其狀
也若不信臣言可呼大將軍從事中郎王皮衛軍司
馬劉敞假之恩顧通其歸善之路以問之必可知也
蔡深然之猗密謂皮敞曰二王逆狀主相已具知之
矣卿同之乎二人驚曰無之猗曰此事必無疑吾慙
卿親舊并見族耳於是歔歔流涕皮敞大懼叩頭求

哀倚曰吾爲卿作計卿能用不二人皆曰謹奉大人之教倚曰相國必問卿但云有之若責卿何不先啟卿卽答曰臣誠負死罪然仰惟主上聖性寬慈殿下篤於骨肉恐言成誑僞故也皮傲許諾粲俄而召問二人至不同時而辭若畫一粲以爲信然初斬準從妹爲父孺子淫于侍人父怒殺之而屢以嘲準準深慙志說粲曰東宮萬機之副殿下宜自居之以領相國使天下之早有所繫也至是準又說粲曰昔孝成距子政之言使王氏卒成篡逆可乎粲曰何可之有準曰然誠如聖旨下官亟欲有所言矣但以德非更

生親非皇宗恐忠言暫出霜威已及故不敢耳粲曰君但言之準曰聞風塵之言謂大將軍衛將軍及左右輔皆謀奉太弟尅季春構變殿下宜爲之備不然恐有商臣之禍粲曰爲之柰何準曰主上愛信於太弟恐卒聞未必信也如下官愚意宜緩東宮之禁固勿絕太弟賓客使輕薄之徒得與交游太弟旣素好待士必不思防此嫌輕薄小人不能無逆意以勸太弟之心小人有始無終不能如貫高之流也然後下官爲殿下露表其罪殿下與太宰拘太弟所與交通者考問之窮其事原主上必以無將之罪罪之不然

今朝望多歸太弟王上一旦晏駕恐殿下不得立矣於是粲命卜抽引兵去東宮後聰讌群臣於光極前殿引見太弟又容貌毀悴髮髮蒼然涕泣陳謝聰亦對之悲慟縱酒極歡待之如初粲使王平謂又曰適奉中詔云京師將有變勅裏甲以備之又以為信然令命宮臣裏甲以居粲馳遣告斬準王沉等曰向也王平告云東宮陰備非嘗將若之何準白之聰大驚曰豈有此乎王沉等同聲曰臣等又聞但恐言之陛下弗信於是使粲遣臣準收氏羌酋長十餘人窮問之皆懸首高格燒鐵灼目乃自誣與又同造逆謀聰

謂沉等言曰而今而後吾知卿等忠於朕也當念知無不言勿恨往日言不用也於是誅又素所親厚大臣及東宮官屬數十人皆斬準及闔豎所怨也廢又為北部王粲使準賊殺之坑土衆萬五千餘人平陽街巷為之空遂立粲為皇太子領相國大單于總攝朝政

劉粲嗣偽位立其子元公為太子粲既為斬準所殺劉氏無少長皆斬之

劉曜元海之族子即偽位立其子熙為皇太子曜既為石季龍所敗熙與將相諸侯皆殺之

後趙石勒初爲上黨郡公以其長子興爲上黨國世子興死立第一子弘爲世子領中軍及僭號趙天王行皇帝事立爲太子弘字大雅虛襟愛士好爲文詠其所親昵莫非儒素勒謂徐光曰大雅愔愔殊不似將家子光曰漢祖以馬上取天下孝文以玄默守之聖人之後必世勝殘天之道也勒大悅勒死弘嗣僞位爲石季龍所廢後殺之

石季龍旣廢弘自稱居攝趙王立其子邃爲太子及僭稱大趙天王皇太子季龍荒游廢政多所營繕使邃省可尙書奏事選牧守祀郊廟唯征伐刑斷乃親覽之邃自總百揆之後荒酒淫色驕恣無道或毀爲於田懸管而入或夜出於宮臣家淫其妻妾粧飾宮人美淑者斬首洗血置於盤上傳共視之又內諸比丘尼有姿色者與其交褻而殺之合牛羊肉煮而食之亦賜左右以識其味也河間王宣樂安公韜有寵於季龍邃疾之如仇季龍荒耽內游威刑失度邃以事爲可呈呈之季龍恚曰此小事何足呈也時有所不聞復怒曰何以不呈誚責杖捶月至再三邃甚恨私謂嘗從無窮長生中庶子李顏等曰官家難稱吾欲行冒頓之事卿從我乎顏等伏不敢對邃稱疾不

省事率宮臣文武五百餘騎宴於李顏別舍謂顏等曰我欲至冀州斬石宣有不從者斬行數里騎皆逃散李顏叩頭固諫遂亦昏醉而歸遂母鄭氏聞之私遣中人責遂遂怒殺其使季龍聞遂有疾遣所親任女尚書察之遂呼前與語抽劍擊之季龍大怒收李顏等詰問顏具言始末誅顏等三十餘人幽遂於東宮既而赦之引見大武東堂遂朝而不謝俄而便出季龍遣吏謂遂曰太子應入朝中宮何以便去遂遙出不顧季龍大怒廢遂為庶人其夜殺遂及妻張氏并男女二十六人埋於一棺之中誅其宮臣支黨一

百餘人廢鄭氏為東海太妃立其子宣為皇太子宣母杜昭儀為天王皇后以石韜為太尉與太子選日省可尚書奏事右僕射張離領五兵尚書求媚於宣因說之曰令諸公侯吏部過限宜漸削弱以盛儲威宣素疾石韜之寵乃使離奏奪諸公府吏秦燕義陽樂平四公王欽若等曰秦公韜燕公斌義陽公鑒樂平公皆季龍子所置吏一百九十七人帳下兵二百人自此已下三分置一餘兵五萬悉配東宮於是諸公咸怨為大釁之漸其後宣淫虐日甚而莫敢以告領軍王郎言之於季龍曰今隆冬雪寒而皇太子使人斫伐宮材引於漳水功役

數萬士衆吁嗟陛下宜因游觀而罷之也季龍如其言承和中季龍命宣祈於山川因而游獵乘大輅羽葆華蓋建天子旌旗十月六軍戎卒十八萬出自今明門季龍從其後宮升陵霄觀望之笑曰我家父子如是自非天傾地陷當復何愁但抱子弄孫日爲樂耳宣既馳逐無厭所在陳列行宮四面各以百里爲度驅圍禽獸皆暮集其所文武跪立圍守重行烽炬星羅光燭如晝命勁騎百餘馳射其中宣與嬖姬顯德美人乘輦觀之嬉娛忘反獸殫乃止季龍復命石韜示如之出自并州游於秦晉宣素惡韜寵是行也

疾之彌甚宦者趙生得幸於宣而無寵于韜微勸宣除之於是相圖之計起矣韜起堂於太尉府號曰宣光殿梁長九丈宣視而大怒斬匠截梁而去韜怒增之十丈宣聞之患甚謂所幸楊杯卒成曰韜凶豎勃逆敢違我如是女能殺之者吾入西宮當盡以韜之國邑分封汝等韜旣死主上必親臨喪因行大事蔑不濟矣杯等許諾因韜夜宿於佛精舍宣使杯成及牟皮趙生等緣獼猴梯而入殺韜置其刀箭而去旦宣奏之季龍哀驚氣絕久之方蘇將出臨之其司空李農諫曰害秦公者恐在蕭牆之內慮生非嘗不可以

出季龍乃止嚴兵發哀於天武殿宣乘素車從千人
臨韜不哭直言呵呵使舉衾看尸大笑而去收大將
軍記室叅軍鄭靖尹武等將委之以罪季龍疑宣之
害韜也謀召之懼其不入乃僞言其毋哀過危掇宣
不虞已之見疑也入朝中宮因而止之建興人史科
告稱韜死夜宿東宮楊極家極夜與五人從外來相
語曰大事已定但願大家老壽吾等何患不富貴語
訖科便寢閣中極不見也科尋出逃匿俄而極乃出
求科不得極曰宿客聞人向語當除之斷口舌今而
後得去作大事矣科踰墻獲免季龍馳使收之獲楊

極牛皮趙生等極皮尋皆亾去執趙生詰之生具首
服季龍悲彌甚幽宣於席庫以鐵環穿其頷而鐐之
作數斗米糟和羹飯以猪狗法食之取害韜刀箭舐
其血哀號震動宮殿積柴鄴北樹標其上標末置轆
轤穿之以繩倚梯積柴送於標所使韜親官者郝稚
劉伯拔其髮抽其舌牽之登梯上於柴積郝稚以繩
貫其頷轆轤絞上劉霸斷其手足斫眼潰腹如韜之
四面縱火煙炎際天季龍從昭儀已下數千登中臺
以觀之火滅取灰分置諸門交道中殺其妻子九人
宣小子年數歲季龍甚愛之抱之而泣兒曰非兒罪

季龍欲赦之其大臣不聽遂於抱中取而戮之兒猶
抱季龍而大叫時人莫不爲之流涕又誅其四率已
下三百人官者五十人洩其東宮養猪牛廢宣母杜
氏爲庶人季龍議立太子其太尉張舉進曰燕公斌
彭城公遵竝有武藝文德陛下神齒已衰四海未一
請擇二公而樹之初昭武張豺之破上邽也獲劉曜
幼女年十二有殊色季龍得而嬖之生子世封齊公
至是豺以季龍年長多疾旣立世爲嗣劉當爲太后
已得輔政說季龍曰陛下再立儲宮皆出自娼賤是
以禍亂相尋今宜擇母貴子孝者立之季龍曰卿且

勿言吾知太子處矣又議於東堂季龍曰吾欲以純
灰三斛洗吾腹腸穢惡故生凶子兒年二十餘便欲
殺父今世方十歲比其二十吾已老矣於是與張舉
李農定議勅公卿上書請立世大司農曹莫不署名
季龍使張豺問其故莫頓首曰天下業重不宜立少
是以不敢署也季龍曰莫忠臣也然未達朕意張舉
李農知吾心矣其令諭之遂立世爲皇太子劉氏爲
皇后季龍死世卽僞位爲兄遵所廢石遵季龍子旣
篡世卽僞位以燕王斌子衍爲太子俄爲石鑿所殺
冉閔季龍之養孫旣殺石鑿僭卽皇帝位國號大魏

復姓冉氏立子智爲皇太子

前燕慕容廆爲遼東公立子皝爲世子

慕容皝爲燕王以子雋假節安北將軍東夷較尉左
賢王燕王世子

慕容雋僭卽皇帝位立其世子暉爲皇太子後暉死
謚獻懷復立次子暉爲太子後讌群臣於溝池酒酣
賦詩因談經史語及周太子晉潛然流涕顧謂群臣
曰昔魏武追痛倉舒孫權悼登無已孤嘗謂二主緣
愛稱奇無大雅之體自暉亾以來孤髮髮中白始知
二主有以而然卿等言暉定何如也孤今悼之得無

貽將來乎其司徒左長史李緒對曰獻懷之在東宮
臣爲中庶子旣忝近侍聖質志業臣實不敢不知臣
聞道備而無愆其唯聖人乎先太子大德有八未見
其闕也雋曰卿言亦以過矣然試言之緒曰至孝自
天性與道合此其一也聰敏慧悟機思若流此其二
也沈毅好斷理諳無幽此其三也疾諛亮物雅說直
言此其四也好學愛賢不耻下問此其五也英姿邁
古藝業趨時此其六也虛襟恭讓尊師重道此其七
也輕財好施憫恤民隱此其八也雋泣曰卿雖褒譽
然此兒若在吾死無憂也

前秦苻健僭即皇帝位立子萇為太子萇既死健以

識言三羊五眼苻應故立第三子生為太子苻氏本氏人洪

生健健生故曰三羊生無一目故曰五眼苻堅既殺生遂即號以其子

宏為皇太子其後慕容冲攻長安堅出如五將付宏

以後事宏將母妻宗室男女數千騎出奔歸其南秦

州刺史楊瑩於下辨壁距之乃奔武都氐豪張熙假

道歸於晉處宏於江州宏立位輔國將軍桓玄篡位

以宏為梁州刺史義熙初以謀叛被誅

苻登堅之族孫既即僞位以弟懿為太弟後立其子

伏乾歸逐殺

後秦姚萇僭即皇帝位立長子興為皇太子興字子

畧苻堅時為太子舍人萇之在馬牧興自長安冒難

奔萇遂立之萇出征討嘗留統後事與其中舍人梁

喜洗馬范勗等講論經籍不以兵難廢業時人咸化

之後萇討苻登遣姚碩德鎮李潤碩德萇弟李潤地名尹緯守

長安召興詣行營征南姚方城言於興曰今寇賊未

滅上復寢疾王統苻齋等皆有部曲終為人害宜盡

除之興於是誅苻齋王統徐成毛盛乃赴召興至萇

怒曰王統兄弟是吾州里無他遠志徐成等昔在秦

丹府元龜 卷之三十五
朝竝爲名將天下小定吾方任之柰何輒便誅害令人喪氣會苻登與竇衝相持萇議擊之尹緯言於萇曰太子純厚之稱著於遐邇將領英畧未爲遠近所知宜遣太子親行可以漸廣威武防闕關之原萇從之戒興曰賊徒知汝轉近必相驅入堡聚而掩之無不尅矣比至胡空堡衝圍自解登聞興向胡空堡引還興因襲平涼大獲而歸咸如萇策使興還鎮長安甚有威惠萇死遂嗣位

姚興字即皇帝位立其長子泓爲皇太子泓字元子孝友寬和而無經世之用又多疾病興將以爲嗣而疑焉久之乃立爲太子興每征伐巡游嘗留總後事泓博學善談論尤好詩詠尚書王尚黃門郎段章尚書富允文以儒術侍講胡義周夏侯稚以文章游集泓受經博士淳于岐岐病泓親詣省疾拜於床下自是公侯見師傅皆拜焉興之如平涼也泓留總後事馮翊人劉厥聚衆數千據萬年以叛泓遣鎮軍彭白狼率東宮禁兵討之斬厥赦其餘黨諸將咸勸泓曰殿下神筭電發蕩平醜逆其宜露布表言廣其首級以慰遠近之情泓曰主上委吾後事使式遏寇逆吾綏馭失和以長姦寇方當引咎責躬歸罪行間安敢

過自矜誕以重罪責乎其右僕射韋華聞而謂河南
太守慕容筑曰皇太子實有恭惠之德社稷之福也
時尚書王敏右丞郭播以刑政過寬議欲峻制泓曰
人情挫辱則壯厲之心生政教煩苛則苟免之行立
上之化下如風靡草君等參贊朝化弘明政軌不務
仁恕之道惟欲嚴濼酷刑是豈安上馭下之理乎敏
等遂止其後廣平公弼弼泓弟謀害泓泓稱疾不朝集
兵於第興聞之怒甚收其黨殿中侍御史唐盛孫玄
等殺之泓言於興曰臣誠不肖不能訓諧於弟致弼
構造是非仰慙天日陛下若以臣爲社稷之憂除臣

而國寧亦家之福也若垂天性之恩不忍加臣刑戮
者乞聽臣守藩興慘然改容召冠軍姚讚右僕射梁
喜京兆尹尹昭輔國欽曼龜於諮議堂密謀收弼時
姚紹屯兵雍城馳遣告之速日不決弼黨恟懼興慮
其變乃收弼囚之中曹窮責黨與將殺之泓流涕回
請之乃止

蜀李雄既僭號將立兄蕩子班爲太子時雄有子十
餘人群臣咸欲立雄所生雄曰起兵之初舉手捍頭
本不希帝王之業也值天下喪亂晉氏播蕩群情義
舉志濟塗炭而諸君遂見推逼處王公之上本之基

業功繇先帝吾兄適統丕祚所歸恢懿明獻殆天所命大事垂尅薨於戎陣班姿性仁孝好學風成必爲名器李驥與司徒王達諫曰先王樹家適者所以防篡奪之萌不可不慎吳子捨其子而立其弟所以有專諸之禍宋宣不立與夷而立穆公卒有宋督之變猶子之言豈若子深願陛下思之雄不從竟立班驥退而流涕曰亂自此始矣班字世文謙虛博納敬愛儒賢自何點李釗班皆師之又引名士王嘏及隴西董融天水文夔等以爲賓友每謂融等曰觀周景王太子晉魏太子丕吳太子孫登文章鑒識超然卓絕

采嘗不有慚色何古賢之高朗後人莫之逮也班爲性汎愛動循軌度時諸李子弟皆尚奢靡而班嘗戒厲之每有大議雄輒令豫之班以古者懇田均平貧富獲所今貴者廣占荒田貧者種植無地富者以已所餘而賣之此豈王者大均之義乎雄納之以班爲撫軍及雄寢疾班晝夜侍側雄少數攻戰多被傷夷至是疾甚痕皆膿潰雄子越等惡而遠之班爲吮膿殊無難色每嘗藥流涕不脫衣冠其孝誠如此雄死嗣僞位以李壽錄尚書事輔政班居中執喪禮政事皆委壽及司徒何點尚書令王環等尋爲李越所殺

李壽雄叔父讓之子既僭卽僞位以其子勢爲太子
尋領大將軍錄尚書事壽死勢嗣位

後涼呂光僭卽三河王位立子紹爲世子既僭天王
遂立爲太子後光疾甚以紹爲天王自號爲太上皇
帝光死紹卽位爲庶兄纂所篡自殺

後燕慕容垂初僭卽燕王位立子寶爲王太子及僭
帝號以寶爲皇太子爲寶起丞華觀以寶錄尚書政
事巨細皆委之垂總大綱而已又以寶領侍中大單
于驃騎大將軍幽州牧建留臺於龍城以高陽生慕
容隆錄留臺尚書事實字道祐垂之第四子也少輕

果無志操好人佞已符堅時爲太子洗馬萬年令堅
滄淝之役寶爲陵江將軍及爲太子砥礪自脩敦崇
儒學工談論善屬文曲事垂左右小臣以求美譽垂
之朝士翕然稱之垂亦以爲克保家業甚賢之垂死

嗣位

慕容寶既嗣立以少子濮陽公策爲太子初垂以寶
冢嗣未建憂之寶庶子清河公會多材藝有雄畧垂
深奇之及寶之北伐使會代攝宮事總錄禮遇一同
太子所以見定旨也垂之伐魏以龍城舊都宗廟所
在復使會鎮幽州委以東北之重高選寮屬以崇威

望垂臨死顧命以會爲寶嗣而寶寵愛策意不在會
寶庶長子長樂公盛自以同生年長耻會先之乃盛
稱策宜爲儲貳而非毀會焉寶大悅乃訪其趙王麟
高陽王隆麟等咸希旨贊成之寶遂與麟等定計立
策策母段氏爲皇后策爲皇太子盛會進爵爲王策
字道符年十一美姿貌而蠢弱不慧及寶爲蘭汗所
殺策亦遇害至盛卽僞位謚曰哀太子
慕容盛寶之庶長子僭位立其子遼西公定爲太子
及盛死其太后丁氏以國多難宜立長君意在於歷
遂廢定迎熙熙字道文垂之少子也

慕容雲寶之養子旣弒熙自立復姓高氏以彭爲太子
西秦乞伏乾歸旣僭號秦王立其長子熾盤爲太子
初乾歸降姚興熾盤拜建武將軍行西夷較尉留其
衆鎮苑州及乾歸返政遂立熾盤爲太子領冠軍大
將軍都中外諸軍錄尙書事乞伏熾盤旣嗣僞位立
其第二子慕容末爲太子領撫軍大將軍都督中外諸
軍事熾盤死慕容末嗣僞位

北燕馮跋僭稱天王立其子永爲太子尋領大單于
置四輔

南涼秃髮儁檀僭卽涼王位立世子武臺爲太子

册府元龜 世子

南燕慕容德僭即皇帝位立其兄子超為皇太子初德迎超于長安及至德憂其父曰汝既無子何不早立超為太子不爾恐生人心寤而告其妻曰先帝神明所勅觀此夢意吾將死矣乃下書立超其月德果死超嗣位

北凉沮渠蒙遜僭即河西王位立其子政德為世子加鎮衛大將軍錄尚書事
夏赫連勃勃僭稱天王立子璜為太子

册府元龜

册府元龜

淮南李嗣京叅閱

西極文翔鳳訂正

豫章黃國琦較釋

借偽部 八

知人 寬恕 恩宿 戒懼

知人

傳曰人不易知書曰知人則哲是知非精鑒深識度越群萃者安能善其人倫哉昔晉室衰圯中原俶擾群雄開釁盜竊位號乃有觀貌察言視表知裏揣摩

册府元龜 借偽部 卷三百二十六

其器能探頤於度量淑慝斯辨用舍惟允斯亦臻賞識之與得旌別之吉者焉

前趙劉元海族子曜聰惠有奇度年捌歲從元海獵於西山遇雨止樹下迅雷震樹旁人莫不顛仆曜神色自若元海異之曰吾家千里駒也從兄爲不亡矣劉聰族弟曜字永明嘗輕吳鄧而自比樂毅蕭曹時人莫之許也惟聰每日永明世祖魏武之流何數公足道哉

後趙石季龍滅遼西得公卿人士多殺之其見擢用終至大官者唯有河東裴憲渤海石璞滎陽鄭系潁川荀綽北地傅暢劉群崔悅盧湛等十餘人而已前燕慕容廆嘗言吾積福累仁子孫當有中原旣而生孫雋廆曰此兒骨相不啻吾家得之矣

慕容皝卽王位時陽鶩字士秋少清素好學器識宏遠起家爲平州別駕屢獻守時疆國之術事多納用慕容廆甚奇之皝遷爲左長史東西征伐參謀帷幃皝臨終謂雋曰陽士秋忠幹貞固可付託大事汝善待之慕容雋之將圖中原也鷲制勝之功竝于慕容恪又皝第五子垂少岐嶷有器度身長七尺七寸手垂過膝皝甚寵之嘗曰而謂諸弟曰此兒闕達好奇

終能破人之家或能成人家故名霸字道業思遇踰
于世子雋故雋不能平之

前秦符洪其孫堅年七歲洪每日此兒姿貌俊偉質
性過人非嘗人相也

符堅以符重之鎮雒陽以呂光爲長史及重謀反堅
聞之曰呂光忠孝方正必不同也馳使命光檻重送
之

後秦姚弋仲初爲石祗右丞相祗與冉閔相攻弋仲
遣其子襄救祗戒襄曰汝才十倍於閔若不梟擒不
須復見我也襄擊閔於嘗盧澤大破之而歸弋仲怒

襄之不擒閔也杖之一百

姚興時以楊佛嵩都督嶺北討虜諸軍事安遠將軍
雍州刺史率嶺北見兵以討赫連勃勃佛嵩發數日
興謂群臣曰佛嵩驍猛果銳每臨敵對寇不可制抑
吾嘗節之配兵不過五千今衆旅旣多遇賊必敗今
去已遠追之無及吾深憂之其下咸以爲不然佛嵩
果爲勃勃所執絕吭而死

後蜀李流素重兄子雄有長者之德每云興吾家者
必此人矣勅諸子尊奉之流疾篤謂諸將曰驍騎高
明仁愛識斷多奇固足以濟大事然前軍英武殆天

所相可共受事於前軍以爲成都王
後燕慕容盛垂之庶孫盛之僭位征高句驪契丹慕
容熙從征皆勇冠諸將盛曰叔父雄果英壯有世祖
之風但弘畧不如耳

寬恕

仲尼有言曰爲君者寬裕以容其民又曰寬以得衆
恕以利勑斯居上之道也若乃跨據山河盜竊名器
征伐自出禮樂自用亦能恢其大體成其衆務至有
覆敗師旅抵觸忌諱或引已而自責或開心而容受
至於奔亡越境則歸其妻孥過惡雖彰而復其位遇
故人必爲用下無猜心夫所以能致於成功亦克永
世者良爲此也

前涼張駿爲涼州牧遣武威太守竇濤等東會韓璞
等攻討劉曜所陷秦州諸郡曜將劉喬來距璞軍糧
竭遣武興太守辛巖督運於金城劉喬率騎三千襲
巖于沃子嶺敗之璞軍遂潰死者二萬餘人面縛歸
罪駿曰孤之罪也將軍何辱皆赦之西域長史李柏
請擊叛將趙貞所敗議者以柏造謀致敗請誅之駿
曰吾每以漢世宗之殺王恢不如秦穆之赦孟明竟
以滅死論群心咸悅

後趙石勒初僭稱趙王宮殿及諸門始就制法令甚嚴諱胡尤峻有醉胡乘馬突入止車門勒大怒謂宮門小執法馮翊曰夫人君為令尚望威行天下况宮闕之間乎向馳馬入門為是何人而勿彈白邪翊惶懼忘諱對曰向有醉胡乘馬馳入甚呵禦之而不可與語勒笑曰胡人正自難與言怨而不罪勒以參軍樊坦清貧擢授章武內史既而入辭勒見坦衣冠敝壞大驚曰樊參軍何貧之甚也坦性誠朴率然而對曰頃遭羯賊無道資財蕩盡勒笑曰羯賊乃爾暴掠邪今當相償耳坦大懼叩頭泣謝勒曰孤律自防俗士不關卿輩老書生也

前秦苻堅僭稱天王慕容垂初為慕容雋所封吳王與世子全奔於堅堅相王猛伐維引全為參軍猛乃令人詭傳垂語於全曰吾已東還汝可為計全信之乃奔暉猛表全叛狀垂懼而東奔及藍田為追騎所獲堅立引見東堂慙勉之曰卿家國失和委身設朕賢子志不忘本猶懷首丘書不云乎父子無相及也卿何為過懼而狼狽若斯也於是復垂爵位待如初堅兄法子東海公陽與王猛子散騎侍郎皮謀反事洩堅問反狀陽曰禮云父母之仇不同天地臣父哀

公死不以罪齊襄復九世之仇而况臣也皮曰臣父丞相有佐命之勲而臣不免貧餒所以圖富也堅流涕謂陽曰哀公之薨事不在朕卿寧不知之讓皮曰丞相臨終託卿以十具牛為田不聞為卿求位知子莫如父何斯言之徵也皆赦不誅徙陽於高昌皮於朔方之北

後秦姚弋仲初為石祗右丞相部曲馬何羅博學有文才張豺之輔石氏也背弋仲歸豺豺以為尚書郎豺敗復歸咸勸殺之弋仲曰今正是招才納奇之日當收其力用不足害也以為參軍其寬恕如此

姚興嗣偽位徵涼州刺史王尚還長安既至坐匿呂氏宮人擅殺逃人薄禾等禁止南臺涼州別駕宗敞治中張穆主簿邊憲胡威等上疏理之興乃赦尚之罪以為尚書

後蜀李雄僭稱成都王性寬厚簡刑約法甚有名稱氏符成文隗旣降復叛手傷雄母及其來也咸釋其罪厚加待之由是夷夏安之威震西土時海內大亂而蜀無事故歸之者相尋

後燕慕容盛僭稱燕王遣輔國將軍李早討遼西及還聞盛殺其將魏雙懼棄軍奔走旣而歸罪復其爵

位盛謂侍中孫勅曰早總三軍之任荷專征之重不能杖節死綏無故逃亡考之軍正不赦之罪也然當先帝之避難衆情離貳骨肉忘其親股肱失忠節早以刑餘之體効力盡命忠欸之至精貫白日朕故錄其忘身之功免其丘山之罪

北涼沮渠蒙遜僭稱涼王西郡太守梁中庸西奔李玄盛蒙遜聞之笑曰吾與中庸義深一體而不信我但自負耳孤豈怪之乃盡歸其妻孥又張掖太守句呼勒出奔西涼後復奔還待之如初

恩宥

金行中圯壤醜亂華鴟義荐張梟巢競啓恣用庶戮威雷無辜亦有僭據之初慶賚之際懼上帝之弗祐慮下民之有辭弛秋荼之刑縱凝脂之網布維新之令示更始之仁小惠未孚衆弗懷也

前涼張茂涼州牧寔之弟晉太興三年寔爲鬪沙等所害州人推茂爲涼州牧乃誅鬪沙及黨與數百人赦其境內

駿茂之弟晉大寧三年黃門侍郎史淑在姑臧拜駿爲涼州牧西平公駿赦其境內其後劉曜遣將劉喬入據振武河西大震遣皇甫該禦之赦其境內

重華駿之子晉永和二年自稱持節大都督大尉護
羗校尉涼州牧西平公假涼王赦其境內

祚重華之庶兄晉永和十年廢重華之子耀靈僭稱
帝號赦殊死已下

玄靚重華之子晉永和十二年自號大都督大將軍
校尉涼州牧西平公赦其境內

前趙劉元海晉永興元年僭卽漢王位赦其境內永
嘉二年僭卽皇帝位大赦境內是年遷都平陽汾水
中得玉璽文曰有新保之蓋王莽時璽也得者因增
泉海光三字元海以爲已瑞大赦境內

聰元海之子晉永嘉四年僭卽皇帝位大赦境內嘉
平中以太廟新成改元建元大赦境內及劉曜陷長
安外城愍帝使侍中宋敞送牋于曜帝出降至平陽
聰使子粲告于大廟改年麟嘉大赦境內後聰殺僞
大弟又立粲爲太子大赦殊死已下

粲聰之子太興元年嗣僞位大赦境內

曜元海之族子晉太興元年僭卽皇帝位大赦境內
唯靳準一門不在赦例是年繕宗廟社稷南北郊大
赦境內殊死已下後終南山推長安人劉終於摧所
得白玉方一尺有文字曰皇亡皇亡敗趙昌井水竭

構五梁罅西小襄困置喪鳴呼鳴呼赤牛奮矧其盡
乎時郡臣咸賀以爲勒滅之徵曜大悅齋七日後受
之於大廟又大赦境內及塋其父墓號永垣陵葬妻
羊氏墓號顯平陵大赦境內殊死已下又嘗因疾瘵
曲赦長安殊死已下咸和三年躬親二郊飭繕神祠
望秩山川靡不周及大赦殊死已下復百姓租稅之
半

後趙石勒晉太興二年卽僞趙王位赦殊死已下稱
元年至十一年荏平獲黑兔獻之於勒於是大悅赦
境內改元太和三年僭卽皇帝位改元建平大赦境

內其後秦州送白獸白鹿荊州送白雉白兔濟陰水
迎理茸露降苑鄉勒以休瑞竝臻遐方慕義赦三歲
刑已下均百姓去年租調特赦涼州殊死勒南郊有
白氣自壇屬天勒大悅還宮赦四歲刑勒又耕籍田
還宮赦五歲刑

弘勒之子晉咸和七年嗣僞位改元延熙赦其境內
殊死已下

季龍勒之弟晉咸康元年廢石弘稱居攝趙天王改
元建武赦其境內是年遷僞鄴宮樹兩周洽季龍大
悅赦殊死已下二年使牙門將張彌徙雒陽鍾簏九

龍翁仲銅駝飛廉干鄴季龍大悅赦二歲刑三年僭
 稱大趙天王卽位于南郊大赦殊死已下六年大旱
 季龍下書曰前以豐國澠池二冶初建炎刑徒配之
 權救時務而王者循爲嘗法致起怨聲自今罪犯流
 徒皆當申奏不得輒配也京獄見囚非手殺一人一
 皆原遣其日澍雨永和五年僭卽皇帝位于南郊大
 赦境內建元曰太寧
 遵季龍之子晉永和六年僭卽皇帝位于大武殿前
 大赦殊死已下

鑒大季龍之子晉永和六年篡遵卽僞位大赦殊死

已下

再閱晉永和六年殺石鑒僭卽皇帝位于南郊大赦
 改國號大魏

後蜀李特晉大安元年自稱益州牧都督梁益二州
 諸軍事大將軍大都督赦其境內

雄特之子旣尅成都諸將固請雄卽尊位以晉元興
 元年僭稱成都王赦其境內是年僭卽帝位赦其境
 內其後遣鎮南任回征木落分寧州之援寧州刺史
 尹奉降遂有南中之地雄於是赦其境內又執梓潼
 太守譙登遂乘勝進軍討文碩害之雄大悅赦其境

內

期雄弟四子晉咸和九年僭卽皇帝位大赦境內

壽特弟驥之子晉咸康四年僭卽僞位赦其境內

勢壽之子晉咸康八年嗣僞位赦其境內太保李奕

自晉壽舉兵反之蜀人多有從者衆至數萬勢登城

距戰奕單騎突門門者射而殺之衆乃潰散勢旣誅

奕大赦境內改元嘉寧

前燕慕容皝晉咸康三年僭卽王位赦其境內

雋皝之子晉永和五年嗣僞燕王赦其境內八年僭

卽皇帝位大赦境內其後太子曄死立次子辟

太子赦其境內

曄雋之子晉昇平四年僭卽皇帝位大赦境內是歲

太師慕容根謀爲亂於是使其侍中皇甫真護軍傅

顏收根等於禁中斬之大赦境內

後燕慕容垂晉大元十一年僭卽帝位赦其境內

寶垂之子大元二十一年嗣僞位大赦境內

盛寶之子晉隆安二年以長樂王稱制赦其境內是

年僭卽帝位大赦殊死已下其後立子遼西公爲太

子赦殊死已下

熙垂之子嗣僞位赦殊死已下其後立貴嬪苻氏爲

皇后赦殊死已下

雲寶之養子晉義熙二年僭即天王位復姓高氏大

赦境内殊死已下

南燕慕容德晉隆安四年僭立為燕王大赦境内殊

死已下稱元年四年僭即皇帝位于南郊大赦義熙

元年立兄子超為太子大赦境内子為父後者人爵

二級

超德之兄子晉義熙元年僭即偽位大赦境内其後

祀南郊將登壇有獸大如馬狀類鼠而色赤集於圓

丘之側俄而不知所在須臾大風暴起天地晝昏其

行宮羽儀皆震裂超密問於太史令成公綏對曰陛

下信用姦臣誅戮賢良賦歛繁多事役殷苦所致超

懼而大赦

北燕馮跋晉大元二十年僭稱天王于昌黎赦其境

内

前秦苻健晉永和七年僭稱天王大單于赦境内死

罪

生健第三子晉永和十二年僭即皇帝位大赦境内

堅生之從弟晉升平元年僭即大秦天王赦其境内

三年南游霸陵大赦五年鳳凰集於東關大赦其境

內百寮進位一級太和五年平鄴都赦慕容暉及其王公已下皆徙于長安封授有差

丕堅之子晉太元十年僭卽皇帝位於晉陽大赦境內

登堅之族孫晉大元十一年僭卽皇帝位大赦境內後秦姚萇晉太元九年自稱大將軍大單于萬年秦王大悅赦境內十一年僭卽皇帝位於長安大赦姚興萇之子晉太元十九年僭卽皇帝位於槐里大赦境內其後以日月薄蝕降號稱王大赦境內因立其子泓爲皇太子大赦境內賜男子爲父後者爵一

級又以姚碩德來朝大赦境內

姚泓興之子晉義熙十二年僭卽皇帝位大赦殊死已下

西秦乞伏乾歸晉太元十三年自立爲大都督大將軍大單于河南王赦其境內十七年平隴西巴西之地赦其境內殊死已下義熙三年僭稱秦王赦其境內

熾盤乾歸之子晉義熙六年襲位大赦元熙元年立其第二子慕末爲太子領撫軍大將都督中外諸軍事大赦境內其臣佐等多所封授

後涼呂光晉太元十三年入姑臧自稱涼州牧酒泉
公大赦境內十四年僭卽三
王位赦其境內二十
一年僭卽天王位大赦境內

纂光之子晉隆安四年僭卽天王位大赦境內

隆光弟寶之子晉元興元年僭卽天王位大赦

西涼李暠晉隆平四年晉昌太守唐瑤推暠爲大都
督大將軍涼公赦其境內

歆暠之子宋永初元年嗣公僞位大赦境內

南涼秃髮烏孤晉隆安元年自稱大都督大將軍大
單于西平王赦其境內

利鹿孤烏孤之弟晉隆安三年卽僞位赦其境內殊
死已下旣逾年改元赦其境內

僞檀利鹿孤之弟晉元興元年僭卽涼王位赦其境
內

北涼沮渠蒙遜晉隆安五年自稱使持節大都督大
將軍涼州牧張掖公赦其境內義熙八年僭卽河西
王位大赦境內及蒙遜母車氏疾篤大赦殊死已下
其後以歲旱下書曰頃自春炎旱害及時苗碧原青
野條爲枯壤將刑政失中下有冤獄乎後繁賦重上
天所譴乎內省多缺孤之罪也書不云乎百姓有過

在予一人可大赦殊死已下

夏赫連勃勃晉義熙二年僭稱天王大單于赦其境內特姚興鎮北將軍王買德來奔謂勃勃曰今秦政雖衰藩鎮猶固深願蓄力待時詳而後舉勃勃善之乃赦其境內其後雍州百姓逐刺史朱齡石而迎勃勃入長安爲壇于灊上僭卽皇帝位赦其境內及自長安還統萬以宮殿大成於是赦其境內

戒懼

夫戒慎乎其所不覩恐懼乎其所不聞蓋君子防微而深慮者也若乃典午中圯諸國蚩蚩各擅土宇自署君長亦能見異知戒臨事而懼或博訪于政治或詢求于讜直兢兢惕息有爲國之風雖修德之不足亦力行之可見矣

前趙劉淵建號令其子聰寇雒陽聰等至宜陽恃連勝不設備弘農大守垣延詐降夜襲聰軍大敗而還淵素服迎師

劉聰時流星起於牽牛入紫微龍形委蛇其光焰地落于平陽北十里視之則有肉長三十步廣二十七步臭聞平陽肉旁常有哭聲聰甚惡之延公卿已下問曰朕之不德致有斯異其各極言勿有所諱

劉曜既葬其父大雨霖震墓門屋大風飄發其寢堂
于壇外五十餘步曜避正殿素服哭於東堂五日使
其鎮軍劉襲大嘗梁胥繕復之松柏衆木殖已成林
至是悉枯時武功豕生犬上邽馬生牛及諸妖變不
可勝記曜命其公卿各舉博識直言之士一人司空
劉均舉參軍臺產曜親臨東堂遣中黃門策問之產
極言其故曜覽而嘉之引見東堂訪以政事產流涕
歔歔具陳災變之禍政化之闕辭旨諒直曜改容禮
之曜夢三人金面丹唇東向遙巡不言而退曜拜而
履其跡旦召公卿已下議之朝臣咸賀以爲吉祥惟

太史令任義進曰三者曆運統之極也東震位王者
之始次也金爲兌位物衰落也唇丹不言事之畢也
遙巡揖讓退舍之道也爲之拜者屈伏於人也履跡
而行懼不出疆也東井秦木也五車趙分也秦兵必
暴起亡主喪師留敗趙地遠至三年近七百日其應
不遠願陛下思而防之曜大懼於是躬親二郊飭繕
神祠望秩山川靡不周及大赦殊死已下復百姓稅
租之半

後趙石勒以日蝕避正殿三日令群公卿士各上封
事勒時暴風大雨震電建德殿端門襄國市西門殺

五人電起西河介山大如鷄子平地三尺滂下丈餘行人禽獸死者萬數大原樂平武鄉趙郡廣平鉅鹿千餘里樹木摧折禾稼蕩然勒正服于東堂以問徐光曰歷代已來有斯災幾也光對曰周漢魏晉皆有之雖天地之嘗然明主未始不爲變所以敬天怒也去年禁寒食介推帝鄉之神也歷代所尊或者以爲未宜替也一人吁嗟王道尚爲之虧况群神怨憾而不怒動上帝乎縱不令天下同爾介山左右晉文之所封也宜任百姓奉之勒境內大疫死者十二三乃罷徵文殿作

天季龍嗣僞位以冀州百郡雨雹大傷秋稼下書深自咎責遣御史所在發水次倉麥振給秋種尤甚之處差復一年時旱白虹經天季龍下書曰朕在位六載不能上和乾象下濟黎元以致是虹之變其令百僚各上封事解西山之禁蒲葦魚鹽除歲供之外皆無禁固公侯卿牧不得規占山澤奪百姓之利時白虹出自大社經鳳陽門東南連天十餘刻乃滅季龍下書曰蓋古明王之理天下也政以均平爲首化以仁惠爲本故能允協人和緝熙神物朕以眇薄君臨萬邦夕惕乾乾思遵古烈是以每下書蠲除徭賦休

息黎元庶俯懷百姓仰稟三光而中年已來變責彌顯天文錯亂時氣不應斯由人怨於下譴感皇天雖朕之不明亦群后不能翼獎之所致也昔楚相修政洪災旋弭鄭卿勵道氛祲自消股肱之良用康群變而群公卿士各懷道迷邦拱默成敗豈所望於台輔百司哉其各上封事極言無隱於是閉鳳陽門唯元日乃開

前秦苻健時蝗蟲大起自華澤至隴山食百草無遺牛馬相噉毛猛獸及狼食人行路斷絕健自蠲百姓租稅減膳徹縣素服避正殿苻堅時秦雍二州地震

裂水湧出金象生毛長安大風震雹壞屋殺人堅懼而愈修德政焉時秋大旱堅咸膳徹懸金玉綺綉皆散之戎士後宮悉去羅紈衣不曳地開山澤之利公私共之偃甲息兵與境內休息又課百姓區種懼歲不登省節穀帛之費大官後宮減嘗度二等百寮之秩以次降之

後秦姚萇時天大雪萇下書深自責罰散後宮文綺珍寶以供戎事身食一味妻不重綵姚興嗣位以日月薄蝕降號稱王大赦改元

後蜀李壽既僭卽帝位時大風暴雨震其端門壽深

自悔責命群司極盡忠言勿拘忌諱

册府元龜

[Faded vertical text columns, likely bleed-through from the reverse side of the page]

